

# 般舟三昧經

後漢月支三藏支婁迦讖譯



南無本師釋迦牟尼佛

## 說明

本繁體校正版《般舟三昧經》電子書，根據《乾隆大藏經》大乘大集部，第 0069 部，後漢月支三藏支婁迦讖譯《般舟三昧經》影印本校正，句讀僅供參考。

本電子書是免費結緣品，特此說明。

仁慧草堂

二〇一九年一月



掃碼關注仁慧草堂微信公眾號

# 目 录

起誦儀 .....	- 1 -
香讚 .....	- 1 -
淨口業真言 .....	- 1 -
淨三業真言 .....	- 1 -
安土地真言 .....	- 1 -
普供養真言 .....	- 1 -
開經偈 .....	- 2 -
般舟三昧經卷上 .....	- 3 -
問事品第一 .....	- 3 -
行品第二 .....	- 9 -
四事品第三 .....	- 14 -
譬喻品第四 .....	- 18 -
般舟三昧經卷中 .....	- 24 -
無著品第五 .....	- 24 -
四輩品第六 .....	- 27 -
授決品第七 .....	- 34 -
擁護品第八 .....	- 40 -
羼羅耶佛品第九 .....	- 44 -
般舟三昧經卷下 .....	- 49 -
請佛品第十 .....	- 49 -
無想品第十一 .....	- 56 -
十八不共十種力品第十二 .....	- 58 -
勸助品第十三 .....	- 60 -
師子意佛品第十四 .....	- 62 -
至誠佛品第十五 .....	- 66 -
佛印品第十六 .....	- 68 -
結誦儀 .....	- 70 -
補闕真言 .....	- 70 -
補闕圓滿真言 .....	- 70 -
普回向真言 .....	- 70 -
迴向偈 .....	- 71 -
三皈依 .....	- 71 -

## ●起誦儀

### 香讚

(一編)

爐香乍爇. 法界蒙薰. 諸佛海會悉遙聞. 隨處結  
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

### 淨口業真言

(三編)

唵. 修唎. 修唎. 摩訶修唎. 修修唎. 薩婆訶.

### 淨三業真言

(三編)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

### 安土地真言

(三編)

南無三滿多. 母馱喃. 唵. 度嚕度嚕. 地尾. 娑婆訶

### 普供養真言

(三編)

唵. 誡誡曩. 三婆嚩. 禡日囉斛.

南無本師釋迦牟尼佛（合掌三稱）

開經偈

（一編）

無上甚深微妙法 百千萬劫難遭遇  
我今見聞得受持 願解如來真實義

# 般舟三昧經卷上

亦名十方現在佛  
悉在前立定經

後漢月支三藏支婁迦讖譯

## 問事品第一

聞如是：

一時，佛在羅閱祇迦鄰竹園中，與大比丘衆，比丘五百人，皆是阿羅漢，諸漏已盡無復塵垢，生死悉除而得自在，心已解脫照明於慧，譬如大龍聖智通達，所作已辦衆行具足，棄捐重擔所欲自從，已捨諸有其行平等，得制其心度於彼岸，唯除一人賢者阿難。

爾時，有菩薩名颯陀和，與五百菩薩俱，皆持五戒，晡時至佛所前，以頭面著佛足，却坐一面；并與五百沙門俱至佛所前，爲佛作禮，却坐一面。時，佛放威神，諸比丘所在遠方無不來者。即時十萬比丘俱相隨來，會佛所前，爲佛作禮，却坐一面。佛復放威神，摩訶波和提比丘尼與三萬比丘尼，俱相隨至佛所前，爲佛作禮，却坐一面。佛復放威神，羅鄰那竭菩薩從墮舍利大國出，憍曰兜菩薩從占波大國出，那羅達菩薩從波羅斯大國出，須深菩薩從迦羅衛大國出，摩訶須薩和

菩薩與阿難邠坻迦羅越俱從舍衛大國出，因坻達菩薩從鳩睺彌大國出，和倫調菩薩從沙祇大國出，一一菩薩各與二萬八千人俱來到佛所前，爲佛作禮，皆却坐一面。羅閱祇王阿闍世與十萬人俱來到佛所前，爲佛作禮，却坐一面。四天王、釋提桓因、梵摩三鉢摩夷亘天、阿迦尼吒天各各與若干億億百千天子俱來到佛所前，爲佛作禮，却住一面。難頭和難龍王、婆竭龍王、摩難斯龍王、阿耨達龍王各各與若干龍王億億百千萬俱來到佛所前，爲佛作禮，却住一面。四面阿須倫王各與若干阿須倫民億億百千萬俱來到佛所前，爲佛作禮，却住一面。時，諸比丘、比丘尼、優婆塞、優婆夷、諸天、諸龍、諸阿須倫民、諸閱叉鬼神、諸迦留羅鬼神、諸眞陀羅鬼神、諸摩睺勒鬼神、諸人非人無央數，都不可計。

跋陀怱菩薩從座起，整衣服，叉手長跪白佛言：“願欲有所問，旣問者欲有所因故。天中天！聽我言者，今當問佛。”

佛告跋陀怱菩薩：“所用故者便問，佛當爲汝說之。”

跋陀怱菩薩問佛言：“菩薩當作何等三昧？所得智慧如大海、如須彌山，所問者不疑，終不

失人中之將，自致成佛終不退，終不生愚癡之處。豫知去來之事，未曾離佛時，若於夢中亦不離佛。端正姝好，於衆中顏色無比。少小常在尊貴大姓家生，若其父母、兄弟、宗親、知識無不敬愛者。高才廣博<sup>1</sup>，所議作者與衆絕異，自守節度，常內慙色，終不自大，常有慈哀。智慮通達，於智中明無有與等者。威神無比，精進難及，入諸經中，多入諸經中，諸經中無不解者。安樂入禪入定入空，無所想無所著，於是三事中不恐，多爲人說經，便隨護之。在所欲生何所自恣，無異本功德力、所信力，多所至到處其筋力強，無不欲愛力，無不有根力，明於所向力，明於所念力，明於所視力，明於所信力，明於所願力。在所問，如大海無有減盡時；如月盛滿時，悉徧照，無有不減明者；如日初出時，如炬火在，所照無所罣礙。不著心如虛空無所止，如金剛鑽無所不入，安如須彌山不可動，如門闌正住堅，心軟如鵠毛，無有麤棄。身無所貪慕，樂於山川如野鹿，常自守不與人從事。若沙門道人多所教授皆護視，若有輕憍者終無瞋恚心，一切諸魔不能動，解於諸經入諸慧中，學諸佛法無有能爲作師者，威力聖

<sup>1</sup> 永樂北藏：博；龍藏：博

意無有能動搖者，深入之行常隨無所行常柔弱，於經中常悲，承事於諸佛無有厭，所行種種功德悉逮及，所行常至誠，所信常正無有能亂者，所行常淨潔，臨事能決無有難，清淨於智悉明，得所樂行盡於五蓋，智慧所行，稍稍追成佛之境界，莊嚴諸國土，於戒中清淨，却羅漢、辟支佛心，所作爲者皆究竟，所作功德常在上首，教授人民亦然，於菩薩中所教授無有厭，當所作者度無有極，一切餘道無有能及者，未嘗離佛不見佛，常念諸佛如父母無有異，稍稍得諸佛威神，悉得諸經，明眼所視無所罣礙，諸佛悉在前立，譬如幻師自在所化作諸法，不豫計念便成法，亦無所從來，亦無所從去，如化作，念過去、當來、今現在如夢中，所有分身悉徧至諸佛刹，如日照水中影悉現，所念悉得如響，亦不來亦不去，生死亦如影之分，便所想識如空，於法中無想，莫不歸仰者，一切平等無有異，於經中悉逮知心不可計，一切諸利心不著無所適念，止於諸佛刹無所復罣礙，悉入諸陀羅尼門，於諸經中聞一知萬，諸佛所說經悉能受持，侍諸佛悉得諸力，悉得諸佛威神，勇猛無所難，行步如猛師子無所畏，於諸國土無不用言者，所聞者未曾有忘時，一切諸佛之

議等無有異，悉了知本無經不恐，欲得諸經便自知說，如諸佛終無厭，爲世間人之師無不依附者，其行方幅無有諂僞，諸刹照明，眼不著於三處，所行無所罣礙，於衆輩中無所適，於本際法中無所慕，於薩芸若教人入佛道中，未曾恐怖，無有畏懼時，悉曉知佛諸經所有卷所在，衆會中無不蒙福者，見佛極大慈歡喜，所學諸佛經通利，於大衆中無所畏，於大衆中無有能過者，名聲極遠，破壞諸疑難無不解者，於經中極尊，於師子座上坐自在，如諸佛法教，悉曉知佛萬種語，悉入萬億音，愛重諸佛經，常念在左右，則未曾離於諸佛慈，於佛經中樂行，常隨佛出入，常在善知識邊無有厭極時，於十方諸佛刹無所適止，悉逮得願行，度脫十方萬民，智慧珍寶，悉逮得經藏，身如虛空無有想，教人求菩薩道，使佛種不斷，行菩薩道未曾離摩訶衍，逮得摩訶僧那僧涅極廣大道，疾逮得一切智，諸佛皆稱譽，近佛十力地，一切所想悉入中，一切所計悉了知，世間之變悉曉知，成敗之事、生者、滅者悉曉知，入經海寶，開第一之藏，悉布施，悉於諸刹行願亦不在中止，極大變化如佛所樂行，心一反念佛悉在前立，一切適不復願，適無所生處，十方不可計佛刹悉見，

聞諸佛所說經，一一佛、比丘僧悉見，是時不持仙道、羅漢、辟支佛眼視，不於是間，終生彼間，佛剎爾乃見，便於是間坐，悉見諸佛，悉聞諸佛所說經，悉皆受，譬如我今於佛前面見佛菩薩，如是未曾離佛，未曾不聞經。”

佛告跋陀憍菩薩：“善哉！善哉！所問者多所安隱，於世間人民不可復計，天上天下悉安之。今若能問佛如是，若能前世過去佛時，所聞施行作功德所致，供養若干佛已所致，樂於經中所致，作道行、守禁戒所致。自守法行清白不煩濁，輒以乞匄自食，多成就諸菩薩，合會教語諸菩薩，用是故，極大慈哀，一切人民皆於等心，隨時欲見佛即見佛，所願廣大甚深之行，常念佛智慧，悉持經戒，具足佛種，聖心如金剛，悉知世間人民心所念，悉在諸佛前。”

佛告跋陀憍菩薩：“若功德以不可復計。”

佛言：“今現在佛悉在前立三昧，其有行是三昧者，若所問者悉可得。”

跋陀憍菩薩白佛言：“願佛哀說之！今佛說者，多所過度，多所安隱，願佛為諸菩薩現大明！”

佛告跋陀憍菩薩：“一法行常當習持常當守，不復隨餘法，諸功德中最尊第一。何等為第一法

行？是三昧名爲現在佛悉在前立三昧。”

## 行品第二

佛告跋陀愁菩薩：“若有菩薩所念現在，定意向十方佛。若有定意，一切得菩薩高行。何等爲定意？從念佛因緣，向佛念意不亂，從得黠不捨精進，與善知識共行空，除睡卧，不聚會，避惡知識，近善知識，不亂精進，飯知足，不貪衣，不惜壽命，子身避親屬離鄉里，習等意得悲喜心，護行棄蓋習禪，不隨色，不受陰，不入衰，不念四大，不失意，不貪性，解不淨，不捨十方人，活十方人，十方人計爲我所，十方人計爲非我所，一切不欲受，不貿誠習定行，欲諷經，不中犯戒，不失定意，不疑法，不諍佛，不却法，不亂比丘僧，離妄語，助道德家，避癡人世間語，不喜不欲，聞道語具欲聞亦喜，從因緣畜生，不欲聞六味，習爲五習，爲離十惡，爲習十善，爲曉九惱，行八精進，捨八懈怠，爲習八使，爲習九思八大人念，又不著禪聞，不貢高棄自大，聽說法，欲聞經，欲行法，不隨歲計，不受身相，離十方人，不欲受，不貪壽，爲了陰不隨或爲不隨所有求無爲，不欲生死，大畏生死，計陰如賊，計四大如

蛇，十二衰計空，久在三界不安隱，莫忘得無爲，不欲貪欲，願欲棄生死，不隨人諍，不欲墮生死，常立佛前，受身計如夢，以受信不復疑，意無有異，一切滅思想過去事、未來事、今現在事等意，常念諸佛功德，自歸爲依佛，定意得自在，不隨佛身相法，一切一計不與天下諍，所作不諍，從因緣生受了，從佛地度得可法，中法中得下，以了空意計人，亦不有亦不滅，自證無爲黠眼以淨，一切不二覺意不在中邊，一切佛爲一念入，無有癡黠，無有能訶，自得曉覺意故，佛黠不從他人待，得善知識計如佛無有異意，一切在菩薩無有離時，縱一切魔不能動，一切人如鏡中像，見一切佛如畫，一切從法行，爲入清淨菩薩行如是。”

佛言：“持是行法故，致三昧便得三昧，現在諸佛悉在前立。何因致現在諸佛悉在前立三昧？如是，跋陀憇，其有比丘、比丘尼、優婆塞、優婆夷，持戒完具，獨一處止，心念西方阿彌陀佛。今現在隨所聞當念，去是間千億萬佛刹，其國名須摩提，在衆菩薩中央說經，一切常念阿彌陀佛。”

佛告跋陀憇：“譬如人卧出於夢中，見所有金銀珍寶，父母、兄弟、妻子、親屬、知識，相與娛樂，喜樂無背；其覺已爲人說之，後自淚出

念夢中所見。如是，跋陀愁菩薩，若沙門、白衣所聞西方阿彌陀佛刹，常念彼方佛不得缺戒，一心念，若一日晝夜，若七日七夜，過七日已後，見阿彌陀佛，於覺不見，於夢中見之。譬如夢中所見，不知晝，不知夜，亦不知內，亦不知外，不用在冥中故不見，不用有所蔽礙故不見。如是，跋陀愁，菩薩心當作是念：‘時，諸佛國境界名大山須彌山，其有幽冥之處悉爲開闢，目亦不蔽，心亦不礙。’是菩薩摩訶薩，不持天眼徹視，不持天耳徹聽，不持神足到其佛刹，不於是間終生彼間佛刹乃見，便於是間坐，見阿彌陀佛，聞所說經，悉受得，從三昧中悉能具足，爲人說之。譬如有人，聞墮舍利國中，有婬女人名須門；若復有人，聞婬女人阿凡和利；若復有人聞優婆洹作婬女人，是時三人皆在羅閱念。其人未曾見此三女人，聞之婬意即爲動，便於夢中各往到其所。是時三人皆在羅閱祇國同時念，各於夢中到是婬女人所，與共棲宿，其覺已各自念之。”

佛告跋陀愁：“我持三人已付。若持是事爲說經，使解此慧至不退轉地無上正眞道，然後得佛號曰善覺。如是，跋陀愁，菩薩於是間國土聞阿彌陀佛，數數念；用是念故，見阿彌陀佛，見

佛已從問：‘當持何等法生阿彌陀佛國？’爾時，阿彌陀佛語是菩薩言：‘欲來生我國者，常念我數數，常當守念，莫有休息，如是得來生我國。’”

佛言：“是菩薩用是念佛故，當得生阿彌陀佛國。常念如是佛身，有三十二相，悉具足光明徹照，端正無比，在比丘僧中說經，說經不壞敗色。何等爲不壞敗色？痛癢、思想、生死、識、魂神，地水火風，世間天上，上至梵摩訶梵，不壞敗色，用念佛故得空三昧，如是爲念佛。”

佛告跋陀耆：“菩薩於三昧中誰當證得者？我弟子摩訶迦葉、因坻達菩薩、須眞天子，及時知是三昧者，有行得是三昧者是爲證。何等爲證？證是三昧知爲空定。”

佛告跋陀耆：“乃往過去時有佛，名須波日。時有人行，出入大空澤中，不得飯食，飢渴而卧，出便於夢中得香甜美食，飲食已，其覺腹中空，自念：‘一切所有皆如夢耶。’”

佛言：“其人用念空故，便逮得無所從生法樂，即逮得阿惟越致。如是，跋陀耆，菩薩其所向方，聞現在佛，常念所向方欲見佛，即念佛不當念有，亦無我所立，如想空當念佛立，如以珍寶倚瑠璃上，菩薩如是見十方無央數佛清淨。譬

如人遠出到他郡國，念本鄉里、家室親屬、財產。其人於夢中，歸到故鄉里，見家室親屬，喜共言語，於夢中見已，覺爲知識說之：‘我歸到故鄉里，見我家室親屬。’”

佛言：“菩薩如是，其所向方聞佛名，常念所向方欲見佛，菩薩一切見佛，如持珍寶著瑠璃上。譬如比丘，觀死人骨著前，有觀青時，有觀白時，有觀赤時，有觀黑時。其骨無有持來者，亦無有是骨，亦無所從來，是意所作想有耳！菩薩如是持佛威神力，於三昧中立，在所欲見何方佛，欲見即見。何以故？如是，跋陀憇，是三昧佛力所成，持佛威神。於三昧中立者，有三事：持佛威神力、持佛三昧力、持本功德力，用是三事故得見佛。譬如，跋陀憇，年少之人，端正姝好莊嚴，以持淨器盛好麻油，如持好器盛淨水，如新磨鏡，如無瑕水精，欲自見影，於是自照悉自見影。云何，跋陀憇，其所麻油、水鏡、水精，其人自照，寧有影從外入中不？”

跋陀憇言：“不，天中天！用麻油、水精、水鏡淨潔故，自見其影耳，其影亦不從中出，亦不從外入。”

佛言：“善哉！善哉！跋陀憇，如是，跋陀

想，色清淨，所有者清淨，欲見佛即見，見即問，問即報，聞經大歡喜，作是念：‘佛從何所來？去到何所？’自念：‘佛無所從來，我亦無所至。’自念三處：‘欲處、色處、無想處，是三處意所爲耳！我所念即見。心作佛，心自見，心是佛，心是怛薩阿竭，心是我身，心見佛，心不自知心，心不自見心，心有想爲癡，心無想是泥洹。是法無可樂者，皆念所爲，設使念爲空耳！設有念者亦了無所有。如是，跋陀想，菩薩在三昧中立者，所見如是。’

佛爾時頌偈言：

心者不知心	有心不見心
心起想則癡	無想是泥洹
是法無堅固	常立在於念
以解見空者	一切無想念

### 四事品第三

“菩薩有四法，疾逮得是三昧。何等爲四？一者，所信無有能壞者；二者，精進無有能逮者；三者，所入智慧無有能及者；四者，常與善師從事。是爲四。菩薩復有四事疾得是三昧，何等爲四？一者，不得有世間思想，如指相彈頃三月；

二者，不得卧出三月，如指相彈頃。三者，經行不得休息不得坐三月，除其飯食左右；四者，爲人說經，不得望人衣服、飯食。是爲四。菩薩復有四事疾得是三昧，何等爲四？一者，合會人至佛所；二者，合會人使聽經；三者，不嫉妬；四者，教人學佛道。是爲四。菩薩復有四事疾得是三昧，何等爲四？一者，作佛形像若作畫，用是三昧故；二者，用是三昧故，持好疋素令人寫是三昧；三者，教自貢高人內佛道中；四者，常護佛法。是爲四。”

佛爾時頌偈曰：

常信樂於佛法	受誦是道德化
精進行解深法	立具足等慈哀
當普說佛經卷	廣分布道法教
慎無得貪供養	無所著得是法
在不正瞋恚興	意善解便離欲
常樂定三昧禪	謹慎行得是法
當念佛本功德	天金色百福相
諸種好有威德	現譬如像金山
悉見知諸世間	過去佛及當來
并現在人中尊	天中天 <sup>2</sup> 皆說是

<sup>2</sup> 永樂北藏：大；龍藏：天；校勘：天

當供養斯善救	上好華衆擣香
欣踊心奉飯食	得是法終不久
鼓琴瑟諸妓樂	簫成供佛形像
欣然意悅無量	尊道法得不難
當造起佛形像	諸相好若干種
黃金色無穢漏	疾速得是道尊
堅固敬常以前	聽是法無亂心
常捨離懈怠行	得三昧疾不久
無恚害向他人	當行哀得慈法
普救護功德地	得三昧疾不久
常恭敬於法師	當奉事如世尊
無得惜是經法	得三昧疾不久
慎無得疑斯經	佛讚是正道化
一切佛所歌歎	得三昧疾不久

佛告跋陀毘：「如是菩薩，當慈心，當樂於善師，所視師當如佛，悉具足承事。欲書是三昧經時，若欲學時，菩薩敬師如是。跋陀毘，菩薩於善師有瞋恚，有持善師短，視善師不如佛者，得三昧難。譬如，跋陀毘，明眼人夜半視星宿，見星宿甚衆多。如是，跋陀毘，菩薩持佛威神於三昧中立，東向視若干百千佛、若干百萬佛、若干百億佛，如是十方等悉見諸佛。」

佛告跋陀愆：“是菩薩如佛眼悉知見。如是，跋陀愆，是菩薩欲得見今現在諸佛悉在前立三昧，布施當具足，持戒如是，忍辱、精進、一心、智慧、度脫智慧身悉具足。”

佛爾時頌偈曰：

譬如有人眼清淨	於夜中半而起觀
仰見星宿無數千	晝日思念皆識知
菩薩如是得三昧	見無央數百千佛
皆識念知於諸佛	則爲衆會說世雄
譬如今我覺眼明	清淨無垢見世間
佛子菩薩眼若此	三昧普達見世尊
終不復起吾我想	見十方佛人中尊
除毒清淨無想念	觀此菩薩奇特行
逮聞尊法寂然義	速疾得解空定行
今我亦訓於是法	以成佛道多所安
如阿彌陀國菩薩	見無央數百千佛
得是三昧菩薩然	常見無數百千佛
比丘阿難如勇猛	從我聞法皆受持
逮得三昧亦如是	聞無數法悉奉持
當信三昧疾持行	悉棄世間諸所有
常樂斯經行法施	疾得清淨寂定地

## 譬喻品第四

佛告跋陀愁：“菩薩慈求三昧者，得是三昧已，不精進行者。譬如，跋陀愁，有人載滿船珍寶，欲持渡大海，未至，船中道壞，閻浮利人皆大悲念：‘亡我爾所珍寶。’如是，跋陀愁，是菩薩聞是三昧已，不書、不學、不誦、不持如中法，一切諸天人民皆爲大愁憂言：‘乃亡我爾所經寶，用失是深三昧故。’”

佛言：“是三昧經者，是佛所囑，佛所稱譽。聞是深三昧經者，不書、不學、不誦、不守、不持如法者，無返復愚癡人，自用以爲高，不受是經意欲高才，反不肯學是三昧。譬如，跋陀愁，愚癡之子，有人與滿手栴檀香，不肯受之，反謂與之不淨栴檀香。貨主語其人言：‘此栴檀香卿莫謂不淨乎！且取嗅之知香不？試視之知淨不？癡人閉目不視，不肯嗅。’”

佛言：“其人聞是三昧者，如是不肯受之，反棄捨去，是爲不持戒人，反捨是珍寶經。是爲愚癡無智，自用得禪具足爲度，反呼世間爲有，不入空，不知無。其人聞是三昧已，不樂不信不入中，反作輕戲語：‘佛亦有深經乎？亦有威神

乎？’反形言：‘世間亦有比丘如阿難乎？’”

佛言：“其人從持是三昧者，所去兩兩三三，相與語云：‘是語是何等說？是何從所得是語？是爲自合會作是語耳，是經非佛所說。’”

佛告跋陀愁：“譬如賈客持摩尼珠示田家癡子，其人問賈客：‘平此幾錢？’賈客報言：‘夜半時，於冥處持摩尼珠著冥中，其明所照至，直滿其中寶’”。

佛言：“其人殊不曉其價，反形是摩尼珠言：‘其價能與一頭牛等不？寧可買一頭牛，想是不復過。與我者善，不肯者已。’如是，跋陀愁，其人聞是三昧不信者，反形是經如是。”

佛言：“如菩薩持是三昧，受信者便隨行，四面皆擁護無所畏，持禁戒完具爲得高明，黠慧深入爲他人說之。菩薩當持是三昧分布語人，展轉相傳，令是三昧久在。”

佛言：“癡人自於前世佛所不供養，不作功德，反自貢高，多行誹謗嫉妬，用財利故，但欲求名，但欲譁說，不得善師，亦不明經，聞是三昧已，不信不樂不入中，反誹謗人言：‘是彼不知愧，爲自作是經耳，是經非佛所說。’”

佛告跋陀愁：“我今具語汝。如是，跋陀愁，

求菩薩道者，若善男子、善女人，持是三千國土  
滿其中珍寶施與佛，設有是功德，不如聞是三昧。  
若有菩薩聞是三昧信樂者，其福轉倍多。

佛爾時頌偈言：

假使三千界	滿中珍寶施
供養佛世尊	以用求佛道
設復有比丘	聞是佛三昧
信樂而不疑	其福過彼上
諛諂懷自大	無信在凶害
與惡師相隨	不信是法教
犯戒近惡友	堅住自貢高
各各共議言	是經非佛語
佛不說是議	爲自共合造
此非法王教	共誹謗如斯
竟無有是語	此爲誹謗佛
有樂道法者	我故爲說耳
有聞是經者	仁賢而喜悅
其心常不疑	不言非佛說
奉禁戒清淨	受法諷誦利
執經普講說	則具足道義

佛告跋陀愁：“我所說無有異爾，故說是語  
耳。今見我說是三昧者，其人却後世時，聞是三

昧終不疑，不形笑，不言不信。除在惡師邊，正使在善師邊，其功德薄少，如是輩人，復轉與惡師從事。是輩人者，聞是三昧，不信不樂不入中。何以故？其人未久學，所更佛少所信，智慧少故不信耳。

佛告跋陀愁：“其有菩薩聞是三昧，不形笑，不誹謗者，歡喜不中疑，不言乍信乍不信，樂書、樂學、樂誦、樂持。”

佛言：“我悉預知預見已，其人不獨於一佛所作功德，不於二、若三、若十，悉於百佛所聞是三昧，却後世時，聞是三昧者，書、學、誦、持經卷，最後守一日一夜，福不可計，自致阿惟越致，所願者得。”

佛告跋陀愁：“聽我說譬喻。如是，跋陀愁，有人取一佛刹，破碎如塵。其人取此一塵，悉復破碎如一佛刹塵，都盧悉取一一塵，皆復塵破盡如一佛刹塵。云何，跋陀愁，是塵其數寧多不？”

跋陀愁言：“甚多，甚多，天中天！”

佛告跋陀愁：“我爲若曹引此譬喻。若有一菩薩盡取此塵，一塵置一佛刹，其數爾數佛刹滿其中珍寶悉持供養諸佛，不如聞是三昧。若一菩薩學是三昧已，書學誦持，爲他人說，守須臾間，

是菩薩功德不可復計。”

佛言：“持是三昧者，書學誦持，爲他人說，其福乃爾，何況守是三昧悉具足者？”

佛爾時頌偈言：

三千大千之國土	滿中珍寶用布施
設使不聞是經像	其功德福爲薄少
若有菩薩求衆德	當講奉行是三昧
疾信諷誦此經法	其功德福無有量
如一佛國塵世界	皆破壞碎以爲塵
彼諸佛土過是數	滿中珍寶用布施
其有受持是世尊	四句之義爲人說
是三昧者諸佛慧	得聞功德叵比喻
何況有人自講說	受持諷誦念須臾
轉加增進奉行者	其功德福無有量
假使一切皆爲佛	聖智清淨慧第一
皆於億劫過其數	講說一偈之功德
至於泥洹讚詠福	無數億劫悉歎誦
不能盡究其功德	於是三昧一偈事
一切佛國所有地	四方四隅及上下
滿中珍寶以布施	用供養佛天中天
若有聞是三昧者	得其福祐過於彼
安諦諷誦講說者	引譬功德不可喻

其人貢高終不起 亦無有趣惡道時  
解了深法不疑結 行斯三昧得如是  
學士爲以見奉吾 德重精進普不著  
增益信明爲菩薩 力學三昧佛所讚  
囑累汝等常勤教 力行精進無放逸  
自勗勇猛勤修行 令得大道不復久  
其有誦受是三昧 已爲面見百千佛  
假使最後大恐懼 持此三昧無所畏  
行是比丘以見我 常爲隨佛不遠離  
菩薩聞習三昧者 義當受持爲人說  
菩薩得是三昧者 爾乃名曰博達慧  
爲逮總持佛稱譽 疾成佛道智如海  
常恒誦說是三昧 當從佛法世尊教  
聞其種性得等覺 如佛所歎無有異

般舟三昧經卷上

# 般舟三昧經卷中

後漢月支三藏支婁迦讖譯

## 無著品第五

佛告跋陀愁：“是菩薩三昧當云何？譬如佛今於若前說經，菩薩當作是念：‘諸佛悉在前立。’當具足念諸佛端正，悉欲逮見一一相，當想識無有能見諸佛頂上者，悉具足作是想見諸佛，當作是念：‘我身亦當逮得如是，亦當逮得身相如是，亦當逮得持戒三昧如是。’當作是念：‘我當從心得？從身得？’當復更作念：‘佛亦不用心得，亦不用身得，亦不用心得佛，亦不用色得佛。何以故？心者，佛無心；色者，佛無色。不用是心色，得阿耨多羅三藐三菩提。何以故？佛色以盡，佛痛癢、思想、生死、識了盡。佛所說盡者，愚癡不見不知，智者曉了之。’作是念：‘當持何等念得佛？當持身得佛？當持智慧得佛？’復作是念：‘亦不用身得佛，亦不用智慧得佛。’何以故？智慧索不可得，自復索我了不可得，亦無所得，亦無所見。一切法本無所有，念有因著，無有反言有亦著；是兩者亦不念，亦不復適得其中。但

用是故，亦不在邊，亦不在中，亦不有亦不無。何以故？諸法空，如泥洹，亦不壞，亦不腐，亦不堅，亦不在是間，亦不在彼邊，無有想，不動搖。何等爲不動搖？智者不計，是故不動搖。如是，跋陀愁，菩薩見佛已，菩薩心念無所著。何以故？說無所有，經說無所有，中不著，壞本絕本，是爲無所著。如是，跋陀愁，是菩薩守是三昧，當作是見佛，不當著佛。何以故？設有所著爲自燒。譬如大段鐵著火中燒正赤，有智者不當以手持。何以故？燒人手。如是，跋陀愁，菩薩見佛不當著，色、痛癢、思想、生死、識不當著。何以故？著者，爲燒身。見佛但當念其功德，當索摩訶衍。”

佛告跋陀愁：“是菩薩於三昧中不當有所著，不著者，疾得是三昧。”

佛爾時頌偈言：

如新磨鏡盛油器	女人莊飾自照形
於中起生婬欲心	放逸恣態甚迷惑
追不至誠虛捐法	爲色走使燒其身
女人患害從是起	用不解法非常空
有想菩薩亦如是	我當成佛逮甘露
度脫人民憂惱法	有人想故爲不解

求索人本不可得 亦無生死及泥洹  
法不可擁如水月 觀察佛道無歸趣  
黠慧菩薩當了是 解知世間悉本無  
於諸人物無所著 疾速於世得佛道  
諸佛從心解得道 心者清淨明無垢  
五道鮮潔不受色 有解是者成大道  
一切諸法無色漏 離想者空無想空  
絕去婬欲則脫心 有解此者得三昧  
精進奉行求佛身 當聽諸法本清淨  
無得行求無不求 於是三昧不難得  
觀察所有如虛空 道意寂然審第一  
無想無作亦無聞 是爲解了尊佛道  
見一切色無想念 眼無所著無往來  
常觀諸佛等如空 已度世間諸所求  
其人清淨眼無垢 奉行精進常寂然  
無量經法悉受得 思惟分別是三昧  
行是三昧無所著 除一切冥得定意  
不見世雄無賢聖 諸外異道聞此惑  
超度思想當志行 心以清淨得見佛  
覩諸佛已不復見 爾乃解是尊三昧  
於地水火莫能礙 風種虛空亦不蔽  
行是精進見十方 坐遙聽受所化法

如我於是講說經 樂道法者面見佛  
作行勤力而不著 唯從世尊所說法  
行者如是無所念 專聽道義興法施  
當念解了是三昧 普諦受誦佛所講  
過去諸佛皆論法 當來世尊亦復然  
講說宣布分別義 皆共歎講是三昧  
我亦如是爲人尊 在世無上衆生父  
皆悉解知此道眼 故解說示寂三昧  
其有誦受是三昧 身常安隱意不荒  
是爲諸佛無量德 致尊佛道獲不難  
廣採衆經不可議 欲達一切諸佛化  
速疾去欲諸垢塵 精進行是淨三昧  
現世欲見無數佛 樂從諸尊聽受法  
速疾去色除所著 行是清淨寂三昧  
於是無貪及瞋恚 捨離愚癡捐憎愛  
棄遠無黠除狐疑 如是得解寂三昧

## 四輩品第六

跋陀憍菩薩白佛：“難及天中天說三昧者！若有菩薩，棄愛欲作比丘，聞是三昧已，當云何學？云何持？云何行？”

佛言：“若有菩薩，棄愛欲作比丘，意欲學

是三昧者，誦是三昧者，持是三昧者，當清淨持戒，不得缺戒大如毛髮。何等爲菩薩不缺戒？一切悉護禁法，出入行法，悉當護不得犯戒大如毛髮，常當怖畏遠離於諛諂，悉當護禁，作是護者，是爲清淨持戒。何等爲菩薩缺戒者？是菩薩求色。何等爲求色？其人意念：‘持是功德，使我後世生若作天，若作遮迦越王。’”

佛言：“用是比丘菩薩爲缺戒，其人久持是行持是戒，持是自守福欲所生處，樂於愛欲中，是爲毀戒。”

佛告跋陀愁：“是菩薩比丘，欲學是三昧者，清淨持戒，完具持戒不諛諂。持戒當爲智者所稱譽，爲羅漢所稱譽。於經中當布施，當精進所念強，當多信勸樂，當承事於和尚，當承事於善師。所從聞是三昧者，所可聞是三昧處，當視其人如視佛。”

佛告跋陀愁：“是菩薩視師如視佛者，得三昧疾。設不恭敬於善師，輕易於善師，欺調於善師，正使久學是三昧，久行久持，設不恭敬於師者，疾忘之。”

佛告跋陀愁：“是菩薩若從比丘、比丘尼、優婆塞、優婆夷所得聞是三昧，當視如佛，所聞

是三昧處當尊敬。”

佛告跋陀毘： “菩薩所聞是三昧處，不當持諂意，向是菩薩不得諂意，常當樂獨處止，不惜身命，不得希望人有所索，常行乞食，不受請，不嫉妬，自守節度如法住，所有趣足而已，經行不得懈，不得卧出。如是，跋陀毘，如是經中教其棄愛欲作比丘學是三昧者，當如是，守如是。”

跋陀毘菩薩白佛：“難及天中天所說法！若有後世懈怠菩薩，聞是三昧已，不肯精進，其人自念：‘我當於後世當來佛所索是三昧耳！’云言：‘我曹身羸極有病瘦恐不能求。’聞是經已，懈怠不精進。若復有菩薩精進者，欲學是經，當教之，隨是經中法教。用是經故，不惜軀命，不望人有所得者，有人稱譽者，不用故喜，不大貪鉢，震越無所愛慕，常無所欲，聞是經不懈怠常精進。其人不念：‘我當於後當來佛所乃求索。’自念：‘使我筋髓骨肉皆使枯腐，學是三昧終不懈怠。’自念：‘我終不懈怠死，聞是經已，無不歡樂。’”

時，佛言：“善哉！善哉！跋陀毘，所說者無有異。我助其歡喜，過去、當來、今現在佛我悉助歡喜。”

佛爾時頌偈言：

如我今所說法 悉受學獨處山  
行功德自守節 是三昧不難得  
常乞食不受請 悉棄捨諸欲樂  
所從聞是三昧 敬法師如世尊  
有誦行是三昧 當精進莫懈怠  
不得惜於經法 不求供乃與經  
其有受是三昧 爾乃爲是佛子  
學奉行如是者 得三昧終不久  
常勤力不懈怠 除睡眠心開解  
當遠離惡知識 然後從是法行  
去放逸不休息 常捨離衆聚會  
比丘求斯三昧 隨佛教當如是

跋陀耆菩薩白佛：“比丘尼求菩薩道，欲學是三昧，欲守是三昧，當持何等法住學守是三昧？”

佛告跋陀耆：“比丘尼求摩訶衍三跋致，是三昧學守者，當謙敬，不當嫉妬，不得瞋恚，去自貢高，去自貴大，却於懈怠，當勤精進棄於睡眠不得卧出，悉却財利，悉當淨潔護，不得惜軀命，常當樂於經，當求多學，當棄婬恚癡，出魔羅網去，當棄所好服飾珠環，不得惡口，不得貪愛好鉢、震越，當爲人所稱譽不得有諛諂。學是

三昧時，當敬善師視如佛，當承是經中教守是三昧。”

佛爾時頌偈言：

比丘尼行恭敬	不嫉妬離瞋恚
除憍慢棄自大	行是者得三昧
當精進却睡卧	捐所欲不貪壽
一心慈於是法	求三昧當如是
無得聽貪婬心	棄瞋恚及愚癡
莫得墮魔羅網	求三昧當如是
設有學是三昧	無調戲捨貪身
一切捐衆狐疑	當至誠不虛飾
捨小慈向大慈	敬善師無己已
當去離於衆惡	求三昧當如是
行求法欲得者	不貪著鉢震越
從人聞爾三昧	視如佛等無異

跋陀憍菩薩白佛：“若有白衣菩薩，居家修道，聞是三昧已欲學者，欲守者，當云何於法中立，學守是三昧？”

佛告跋陀憍：“白衣菩薩，聞是三昧已，欲學守者，當持五戒，堅淨潔住，酒不得飲，亦不得飲他人；不得與女人交通，不得自爲，亦不得教他人爲，不得有恩愛於妻子，不得念男女，不

得念財產，常念欲棄妻子行作沙門；常持八關齋，齋時常當於佛寺齋；常當念布施，不念我當自得其福，當用萬民施；常當大慈，於善師、見持戒比丘，不得輕易說其惡。作是行已，當學當守是三昧。”

佛爾時頌偈言：

有居家菩薩	欲得是三昧
常當學究竟	心無所貪慕
誦是三昧時	思樂作沙門
不得貪妻子	捨離於財色
常奉持五戒	一日八關齋
齋時於佛寺	學三昧通利
不得說人惡	無形輕慢行
心無所榮冀	當行是三昧
奉敬諸經法	常喜樂於道
心無有諂僞	棄捨慳妬意
有學是三昧	常當行恭敬
捨自大放逸	奉事比丘僧

跋陀憇菩薩白佛：“若有優婆夷，求摩訶衍三跋致，聞是三昧已，欲學守者，當行何等法，學守是三昧？”

佛告跋陀憇：“若有優婆夷，求摩訶衍三跋

致，聞是三昧已，欲學守者，當持五戒，自歸於三。何等爲三？自歸於佛，歸命於法，歸命於比丘僧。不得事餘道，不得拜於天，不得示吉良日，不得調戲，不得慢恣，不得有貪心。優婆夷常當念布施，勸樂欲聞經，力多學問優婆夷，常當敬重於善師，心常惓惓不懈。若比丘、比丘尼過者，常以座席賓主飲食待之。”

佛爾時頌偈言：

若有優婆夷	誦是三昧者
當從佛法教	奉五戒完具
守是三昧時	當尊敬於佛
及法比丘衆	恭敬於善師
不得事外道	勿祠祀於天
行是三昧者	見人立迎逆
除去殺盜婬	至誠不兩舌
無得向酒家	當行是三昧
心不得懷貪	常當念施與
除去諛諂意	無得說人短
常當恭敬事	比丘比丘尼
聞法語悉受	學三昧如是

## 授決品第七

跋陀怱菩薩問佛：“少有及者！天中天怱薩阿竭乃說是三昧。諸菩薩所樂精進行，無有懈怠於阿耨多羅三藐三菩提。佛般泥洹後，是三昧者，當在閻浮利內不？”

佛告跋陀怱菩薩：“我般泥洹後，是三昧者，當現在四十歲，其後不復現。却後亂世佛經具欲斷時，諸比丘不復承用佛教。然後亂世時，國國相伐，於是時，是三昧當復現閻浮利內，用佛威神故，是三昧經復爲出。”

跋陀怱菩薩、羅鄰那竭菩薩從座起，正衣服，叉手於佛前白佛：“佛般泥洹後亂世時，我曹共護是三昧，持是三昧，具足爲人說之，聞是經卷無有厭極時。”

摩訶須薩和菩薩、憍曰兜菩薩、那羅達菩薩、須深菩薩、因坻達菩薩、和輪調菩薩共白佛言：“佛般泥洹去，却後世亂時，是經卷者，我輩自共護持，使佛道久在。其有未聞者，我輩當共爲說，教授是深經。世間少有信者，我曹悉受之。”

時，五百人從座起，比丘、比丘尼、優婆塞、優婆夷皆叉手於佛前住，白佛：“佛般泥洹後，

亂世時，聞是三昧悉自持護。願持我五百人囑累是八菩薩。”

時，佛笑，口中金色光出，至十方不可計佛國，悉照明還遶身三帀從頂上入。阿難從座起，更被袈裟，前至佛所，爲佛作禮，却住叉手，以偈讚曰：

其心清淨行無穢	神通無極大變化
已過諸礙超衆智	光明除冥去垢塵
智慧無量心普解	佛天中天鷓鴣音
一切外道莫能動	何緣而笑出妙光
願正眞覺爲解說	慈愍一切衆生尊
若有聞佛柔輒音	解釋達聖化俗行
世尊所感非唐舉	衆聖導師不妄笑
今者誰當在決中	世雄願爲解此意
今日誰住道德堅	誰當逮得興妙行
誰今受得深法藏	無上道德衆所歸
今日誰當愍世間	誰當奉受是法教
誰堅立於佛智慧	世尊願爲解說之

佛爾時爲阿難說偈言：

佛語阿難汝見不	五百人等在前立
其心歡然歌頌曰	我等亦當逮是法
顏色和悅敬禮佛	我等何時得如是

皆悉竝立嗟歎佛 我輩會當逮如是  
五百人等今現在 名字雖異本行同  
常樂奉受是深經 於當來世亦復然  
今我囑累告汝等 佛慧無量知彼本  
是等不獨見一佛 亦不立此得其慧  
徹照彼之宿世命 以曾更見八萬佛  
五百人等存在道 常解經義勉行成  
勸助無數諸菩薩 常行慈哀護經法  
勸化一切衆人民 悉令逮得大道行  
知見過去諸世尊 覩八十億那術數  
名德普大脫於心 擁護是法三轉行  
現世於此受我教 分別供養是舍利  
安諦受習佛所化 皆悉諷誦有所付  
著於塔寺及山中 若付天龍乾陀羅  
各各轉授經卷已 壽命終訖生天上  
天上壽盡還世間 各各而生異種性  
當復取此佛道行 分別是經如所願  
用愛樂斯經法故 求輒得之持奉行  
令無數人得聽聞 欣踊難量心無等  
是等黠慧不馱法 非貪軀體及壽命  
降伏一切諸外道 授與經法弘其志  
是經法者無能得 及持諷誦講說者，

今四輩人住我前 五百之衆能堪持  
是八菩薩跋陀憇 羅鄰那竭那羅達  
摩訶須薩和輪調 因坻須深憍曰兜  
比丘及尼清信士 奉玄妙法上義句  
常以經道哀世間 宣暢方等普流化  
跋陀憇等八菩薩 於五百衆爲英雄  
常當奉持方等經 於世之俗無所著  
釋一切縛解空慧 紫磨金色百福相  
恒行慈哀度衆生 施以安隱滅諸塵  
壽終之後生法家 不復歸於三惡道  
世世相隨常和協 然後逮得尊佛道  
已棄捨於八難處 遠離一切諸惡道  
其功德行莫能稱 所壽福祐無能量  
當復值見彌勒佛 咸同一心徃自歸  
悉共供養等慈哀 逮於無上寂滅句  
其心僉然而和同 正意奉事人中尊  
不倚俗事得法忍 疾逮無上大道行  
彼常奉持此經法 夙興夜寐而諷誦  
殖衆功德修梵行 覩彌勒時義若此  
於是賢劫所興佛 慈哀世間放光明  
每所在處普持法 奉事去來現在佛  
皆悉供養諸世雄 見三世尊無衆毒

當疾逮得尊佛道 不可思議無有量  
中有前得佛道者 後人展轉相供養  
不可計劫那術數 如是終竟乃斷絕  
於是居士跋陀憇 羅鄰那竭那羅達  
及須薩和憍曰兜 曾見諸佛如恒沙  
彼當奉事正法化 宣布諸佛無億教  
道行無量不可稱 至于無數億劫中  
假使有人受持名 所周遊處若夢中  
如是勇猛導世間 皆當逮得無上道  
若有覩見及聞聲 其心欣然踊躍者  
皆得佛道不復疑 何況奉受供養者  
若瞋恚之及罵詈 持惡意向搥捶者  
於是八人威神恩 當使得佛況恭敬  
彼所受法不可議 名稱無量及壽命  
光明無限德無疑 智慧無量行亦然  
常得面見無量佛 清淨之戒如恒沙  
於是廣普行布施 以用求索無上道  
無數億劫說其福 莫能齊限厥功德  
受是經法誦習者 逮於大道不復難  
其有愛樂此經卷 受誦諷持講說者  
當知五百人中人 其心愛樂終不疑  
假使施得是經法 愛樂道義加精進

行清淨戒除睡卧 逮是三昧終不難  
欲獲安隱布經戒 比丘受學在閑居  
常行分衛知止足 逮是三昧終不難  
捨離衆鬧不受請 口莫貪味棄愛欲  
所從聞是經法者 敬如世尊常供奉  
除去慳貪受是法 斷絕婬欲棄愚癡  
發起大道心無疑 然後學行是三昧  
行無所著捨諸慾 常自謹慎棄恚恨  
精進奉行佛法教 然後受學是三昧  
不貪男女及所有 遠離憍慢并妻妾  
居家修道常慚愧 然後學誦是三昧  
無賊害心行柔順 不樂謗訕捨諸惡  
不用色求得法忍 當善諷誦是三昧  
若比丘尼學是法 常當恭敬棄憍慢  
遠離調戲及貢高 得是三昧不復難  
常行精進除睡卧 不計吾我諸人物  
愛樂法者不惜命 然後學誦是三昧  
制婬泐意捨所著 無瞋恚心棄諛諂  
終不復墮魔羅網 持是三昧得如是  
於諸衆生行平等 除去放逸衆塵埃  
性無卒暴及麤言 然後學誦是三昧  
於鉢震越及衣服 不得須臾有貪愛

尊敬善師視如佛 然後學誦是三昧  
以逮善利離惡道 一心信樂佛法教  
遠離一切八難處 持是經者得如是

## 擁護品第八

跋陀耆菩薩、羅鄰那竭菩薩、憍曰兜菩薩、那羅達菩薩、須深菩薩、摩訶須薩和菩薩、因坻達菩薩、和倫調菩薩見佛所說，是八菩薩皆大歡喜，持五百劫波育錦衣，持珍寶布施，持身自歸供養佛。

佛語阿難：“是跋陀耆等，於五百菩薩人中之師，常持中正法，合會隨順教莫不歡喜者，歡樂心、隨時心、清淨心、却欲心。”

是時，五百人皆叉手立佛前。跋陀耆菩薩白佛言：“菩薩持幾事得是三昧？天中天！”

佛言：“菩薩有四事疾得是三昧。何等爲四？一者，不信餘道；二者，斷愛欲；三者，如法行；四者，無所貪生。是爲四，菩薩疾得是三昧。”

佛告跋陀耆：“若有菩薩學是三昧者，若持若誦若守，今世即自得五百功德。譬如，跋陀耆，慈心比丘終不中毒，終不中兵，火不能燒，入水不死，帝王不能得其便；如是菩薩守是三昧者，

終不中毒，終不中兵，終不爲火所燒，終不爲水所沒，終不爲帝王得其便。譬如，跋陀怛，劫盡壞燒時，持是三昧菩薩者，正使墮是火中，火即爲滅，譬如大罌水滅小火。”

佛告跋陀怛：“我所語無有異！是菩薩持是三昧者，若帝王、若賊、若水、若火、若龍、若蛇、若閼叉鬼神、若猛獸、若大蟒、若蛟龍、若師子、若虎、若狼、若狗、若人、若非人、若獠獍、若薜荔、若鳩洹鬼神，若欲嬈人，若欲殺人，若欲奪人鉢、震越，若壞人禪奪人念，設欲中是菩薩終不能中。”

佛言：“如我所語無有異！除其宿命不請，其餘無有能中者。”

佛言：“我所語無有異！若有菩薩持是三昧，終不病目，若耳、鼻、口，身體無病，其心終不憂，終不厄。是菩薩若死若近死，設有是患者，佛語爲有異，除其宿命所作。

“復次，跋陀怛，是菩薩諸天皆稱譽，諸龍皆稱譽，諸閼叉鬼神皆稱譽，諸阿須輪皆稱譽，迦留羅鬼神、眞陀羅鬼神、摩睺勒鬼神、若人、非人皆稱譽是菩薩，諸佛天中天皆稱譽是菩薩。復次，跋陀怛，是菩薩爲諸天所護，爲諸龍所護，

四天王、釋提桓因、梵三鉢天皆護是菩薩，閼叉鬼神、乾陀羅鬼神、阿須輪鬼神、迦留羅鬼神、眞陀羅鬼神、摩睺勒鬼神、若人、非人皆共擁護是菩薩，諸佛天中天皆共擁護是菩薩。復次，跋陀怛，是菩薩爲諸天所敬愛，諸龍、閼叉鬼神、乾陀羅鬼神、阿須倫鬼神、迦留羅鬼神、眞陀羅鬼神、摩睺勒鬼神、若人、非人皆共敬愛是菩薩，諸佛天中天皆無有愛欲，以道德故，皆復敬愛是菩薩。復次，跋陀怛，是菩薩諸天皆欲見之，諸龍、閼叉鬼神、乾陀羅鬼神、阿須倫鬼神、迦留羅鬼神、眞陀羅鬼神、摩睺勒鬼神、若人、非人皆思樂欲見是菩薩，諸佛天中天皆各各欲使是菩薩往到其所，用人民故欲使往。復次，跋陀怛，是菩薩諸天皆來至其所，諸龍、閼叉鬼神、乾陀羅鬼神、阿須倫鬼神、迦留羅鬼神、眞陀羅鬼神、摩睺勒鬼神、若人、非人皆來至是菩薩所，與共相見。諸佛天中天，菩薩不但晝日見，夜於夢中，若見諸佛身，若諸佛各各自說其名字。

“復次，跋陀怛，是菩薩所未誦經，前所不聞經卷，是菩薩持是三昧威神，夢中悉自得其經卷名，各各見悉聞經聲。若晝日不得者，若夜於夢中悉見得。”

佛告跋陀惹：“若一劫若復過一劫，我說是菩薩持三昧者，說其功德不可盡竟，何況力求得是三昧者！”

佛爾時頌偈言：

若有菩薩學誦是	佛說三昧寂定義
假使欲歎其功德	譬如恒邊減一沙
刀刃矛戟不中傷	盜賊怨家無能害
國王大臣喜悅向	學此三昧得如是
虵蛇含毒咸可畏	見彼行者毒疾除
不復瞋恚吐惡氣	誦是三昧得如是
怨讎嫌隙莫能當	天龍鬼神真陀羅
覩其威光皆默然	學此三昧得如是
山野獬狼及大蟒	師子猛虎鹿猴獾
無傷害心攝藏毒	悉來親護是行者
弊惡鬼神將人魂	諸天人民懷害心
感其威神自然伏	學此三昧得如是
其人不病無苦痛	耳目聰明無暗塞
言辭辯慧有殊傑	行三昧者速逮是
其人終不墮地獄	離餓鬼道及畜生
世世所生識宿命	學此三昧得如是
鬼神乾陀共擁護	諸天人民亦如是
并阿須倫摩睺勒	行此三昧得如是

諸天悉共頌其德	天人龍鬼真陀羅
諸佛嗟歎令如願	諷誦說經爲人故
其人道意不退轉	法慧之義而無盡
姿顏美艷無與等	誦習此經開化人
國國相伐民荒亂	饑饉荐臻懷苦窮
終不於中天其命	能誦此經化人者
勇猛降伏諸魔事	心無所畏毛不豎
其功德行不可議	行此三昧得如是
妖蠱幻化及符呪	穢濁邪道不正行
終無有能中其身	用愛樂法達本故
一切悉共歌其德	具足定慧佛尊子
然後當來最末世	手得是經得如是
常行精進懷喜踊	同心和悅奉此法
受持經卷講誦諷	今我以是爲彼說

## 羼羅耶佛品第九

佛告跋陀愁：“乃往昔時，不可計阿僧祇劫，爾時有佛，名羼羅耶佛。怛薩阿竭。阿羅訶。三耶三佛，於世間極尊，安定於世間，於經中大明，天上天下號曰天中天。爾時有長者子，名須達，與二萬人俱，來至羼羅耶佛所，爲佛作禮，却坐一面。須達長者子問羼羅耶佛是三昧，羼羅耶佛

知須達長者子心所念，便爲說是三昧。須達長者子聞是三昧已，大歡喜，即悉諷受須作沙門，求是三昧八萬歲。時，長者子須達從佛聞經甚衆多，悉從無央數佛聞經，其智慧甚高明。長者子須達，其後壽終生忉利天上，以後復從天上來下生世間。爾時故劫中復有佛，名術闍波提·怛薩阿竭·阿羅訶·三耶三佛。時，佛在刹利家生。爾時，長者子須達復於佛所聞是三昧，復求之。時，長者子須達，其後復於故劫中復有佛，名賴毗羅耶·怛薩阿竭·阿羅訶·三耶三佛，婆羅門種。時，長者子須達，復於佛所受是三昧，求守八萬四千歲。”

佛告跋陀怛： “長者子須達，却後八萬劫，得作佛，名提和竭羅。爾時，長者子須達，爲人高明勇猛，智慧甚廣。”

佛言： “見是三昧不？跋陀怛，饒益乃爾，使人成就得佛道。若有菩薩得是三昧者，當學誦、當持、當教人、當守，如是者，得佛不久。汝曹知不？跋陀怛，是三昧者，是菩薩眼、諸菩薩母，諸菩薩所歸仰，諸菩薩所出生。汝知不？跋陀怛，是三昧者，破去於冥，明於天上天下。汝知不？跋陀怛，是菩薩三昧者，是諸佛之藏、諸佛之地，是珍寶淵海之泉、無量功德之鎮益。明哲之經，

當作是知三昧所出，如是從中出佛，聞經正立於四意止中。何等爲四意止中？一者，自觀身、觀他人身，自觀身、觀他人身者，本無身；二者，自觀痛癢、觀他人痛癢，自觀痛癢、觀他人痛癢者，本無痛癢；三者，自觀意、觀他人意，自觀意、觀他人意者，本無意；四者，自觀法、觀他人法，自觀法、觀他人法者，本無法。”

佛告跋陀耆：“是三昧誰當信者？獨怛薩阿竭、阿羅訶、三耶三佛、阿惟越致、阿羅漢乃信之耳！有愚癡迷惑心者，離是現在佛前立三昧遠。何以故？是法當念佛，當見佛。”

佛告跋陀耆：“是菩薩當念佛、當見佛、當聞經，不當有著。何以故？佛本無是法無所因。何以故？本空無所有，各各行自念，是法中無所取，是法無所著，如空等甚清淨。是法人所想，了無所有。法無所有故，所因者空耳！如泥洹，是法無所有，本無是法，無所從來，亦無所從去。人本無，是法不著者近，有著者遠。”

佛告跋陀耆：“若有守是三昧者，因想入無想中，見佛念佛，守覺聞經念法，守覺不得念我，不得著法。何以故？有守覺，跋陀耆，有守覺不見佛，有所著如毛髮不得法，施他人有所悵望爲

不施，持戒有所悞望爲不淨，貪於法不得泥洹，於經中有諛諂不得爲高明。樂於衆會中，喜於餘道，終不能得一行。於欲中念，雖有瞋恚不能忍辱，有所憎惡不得說他人，善求阿羅漢道者，不得於是見現在佛悉在前立三昧中，不逮無所從來生法樂於中立，有所著不得空。菩薩終不得慳貪，有懈怠不得道，有婬泆不入觀，有所念不入三昧。”

佛爾時頌偈言：

是等功德不可計	奉戒具足無瑕穢
其心清淨離垢塵	行此三昧得如是
設有持是三昧者	智慧普大無缺減
博達衆義常不忘	功德之行如月明
設有持是三昧者	解了覺意不可議
曉知無量之道法	無數諸天護其德
設有持是三昧者	常自面見無數佛
聞無量佛講說法	輒能受持念普行
設有持是三昧者	惡罪勤苦皆滅除
諸佛於世行愍哀	悉共嗟歎是菩薩
假使菩薩欲覩佛	當來無數佛世尊
一心踊躍住正法	當學諷誦是三昧
其有持是三昧者	其功德福不可議
逮得人身最第一	出家超異行分衛

若有末後得是經 逮功德利最第一  
得其福祚不可限 住是三昧得如是

般舟三昧經卷中

# 般舟三昧經卷下

後漢月支三藏支婁迦讖譯

## 請佛品第十

跋陀耆菩薩整衣服，長跪叉手白佛言：“我欲請佛及比丘僧，明日於舍食，願佛哀受請。”佛及比丘僧默然悉受請。

跋陀耆菩薩知佛已受請，起至摩訶波喻提比丘尼所，白比丘尼言：“願受我請，明日與比丘尼俱，於舍小飯。”摩訶波喻提比丘尼即受請。

跋陀耆菩薩語羅鄰那竭菩薩：“舍弟，諸郡國其有新來人，悉請會佛所。”羅鄰那竭菩薩前至佛所，爲佛作禮，長跪叉手白佛言：“我兄請佛，所有新來人，悉欲請於舍食，願哀受之。”

跋陀耆菩薩、羅鄰那竭菩薩、憍曰兜菩薩、那羅達菩薩、須深菩薩、摩訶須薩和菩薩、因坻達菩薩、和倫調菩薩，悉與宗親俱，前以頭面著佛足，及爲比丘僧作禮。作禮已，竟從佛所去，歸到羅閱祇國，至跋陀耆菩薩家，共相佐助作諸飯具。四天王、釋提桓因、梵三鉢，皆共疾來，佐助跋陀耆菩薩作衆飯具。

爾時，跋陀怱菩薩，宗親共莊嚴羅閱祇國，持若干種雜繒帳覆一國中，其街巷市里皆懸繒旛，舉一國中，悉散華燒香，作百種味飯具用佛故。比丘僧、比丘尼、優婆塞、優婆夷及諸貧窮乞丐者，其飯具適等。何以故？不有偏施，於人民及蝸飛螻動之類悉平等。

跋陀怱與八菩薩，與諸宗親，以飯時俱往詣佛前，以頭面著佛足，却白佛言：“飯食具以辦，願佛可行。”時，佛與比丘僧皆著衣持鉢，俱詣來會者，皆隨行佛入羅閱祇國中，到跋陀怱菩薩家。

跋陀怱菩薩作是念：“今佛威神故，令我舍極廣大，悉作瑠璃，表裏悉相見，城外悉見我舍中，我舍中悉見城外。”佛即知跋陀怱心所念。佛便放威神，令跋陀怱舍極廣大，舉一國中人民，悉見於舍中。佛前入跋陀怱菩薩家坐，比丘僧、比丘尼、優婆塞、優婆夷各各異部悉坐於舍中。跋陀怱菩薩見佛比丘僧坐已，自供養佛、比丘僧，若干百種飯手自斟酌。佛及比丘、比丘尼、優婆塞、優婆夷，皆已乃飯。諸貧窮者悉等與，悉各平足，皆佛威神恩使之足。跋陀怱菩薩見佛諸弟子悉飯已，前行澡水，畢竟持一小机，於佛前坐

聽經。爲跋陀耆菩薩及四輩弟子說經，莫不歡喜者，莫不樂聞者，莫不欲聞者。佛以經請比丘僧及諸弟子，佛起與比丘僧俱去。

跋陀耆菩薩飯已，與宗親俱，出羅閱祇國到佛所，前爲佛作禮，皆却坐一面。及羅鄰那竭菩薩、憍曰兜菩薩、那羅達菩薩、須深菩薩、摩訶須薩和菩薩、因坻達菩薩、和倫調菩薩、跋陀耆菩薩，見人衆皆安坐已，前問佛：“菩薩用幾事得見現在佛悉在前立三昧？”

佛告跋陀耆菩薩：“菩薩有五事，疾得見現在佛悉在前立三昧，學持諦行心不轉。何等爲五？一者，樂於深經無有盡時不可得極，悉脫於衆災變去，以脫諸垢中，以去冥入明，諸朦朧悉消盡。”

佛告跋陀耆：“是菩薩逮得無所從來生法樂，逮得是三昧。復次，跋陀耆，不復樂所向生，是爲二。不復樂喜於餘道，是爲三。不復樂於愛欲中，是爲四。自守行無有極，是爲五。”

“菩薩復有五事，疾得是三昧。何等爲五？一者，布施心不得悔，無所貪，無所惜，從是不得有所希望，施人已後不復恨。復次，跋陀耆，菩薩持經布施，爲他人說經，所語者安諦，無有疑，無所愛惜，說佛深語身自行立是中。復次，

跋陀憇，菩薩不嫉妬，所作無有疑，却睡卧，却五所欲，不自說身善，亦不說他人惡。若有罵者，若有形者，亦不得恚，亦不得恨，亦不得瞋。何以故？入空行故。復次，跋陀憇，菩薩是三昧自學復教他人，書是經著好疋素上使久在。復次，跋陀憇，菩薩所信多樂，敬長老及知識，於新學人若得所施，當念報恩，常有識信，受人小施念報大，何況於多者？菩薩常樂重於經，棄捐無反復之意，常念有反復，如是者，得三昧疾。”

佛爾時頌偈言：

常愛樂法在深解	於諸習欲不貪生
遊步五道無所著	如是行者得三昧
好喜布施不想報	所惠無著不退念
所與不見有受者	唯欲得解佛深慧
愍傷衆生行布施	其心喜勇不悔恨
常立布施及戒忍	精進一心智慧事
具足六度攝一切	慈悲喜護四等心
善權方便濟衆生	如是行者得三昧
若有與施除慳貪	其心歡踊而授與
既施之後恒欣喜	如是行者得三昧
曉知經法分別句	聞深要義佛所教
講說微妙道德化	如是行者得三昧

其人學誦是三昧 具足解慧爲人說  
令此經法得化存 如是行者得三昧  
常不祕奧佛經法 不望供養乃爲講  
唯求安隱佛道地 如是行者得三昧  
除去所著棄諸蓋 捐去貢高及慢大  
不自稱譽說彼短 終不復起吾我想  
其有寂定意不起 便能解是道定慧  
棄捐諛諂心清淨 用是速速不起忍  
常行至誠無綺飾 其願具足無缺減  
殖衆正德無邪行 愛樂法者得道疾  
所誦習經常不忘 常護禁戒清淨行  
如是行者得佛疾 何況奉是寂三昧

佛告跋陀憍菩薩：“往昔無數劫，提和竭羅佛時，我於提和竭羅佛所，聞是三昧即受持是三昧，見十方無央數佛，悉從聞經悉受持。爾時，諸佛悉語我言：“却後無央數劫，汝當作佛，名釋迦文。”

佛告跋陀憍菩薩：“我故語若，今自致作佛。是三昧若曹當學，爲知內法第一，衆所不能及，出衆想去。其有於是三昧中立者，念得佛道。”

佛爾時頌偈言：

憶念我昔定光佛 於時速得是三昧

既見十方無數佛 聞說尊法深妙義  
譬有德人行採寶 所望如願輒得之  
菩薩大士亦如是 經中求寶即得佛

跋陀怱菩薩白佛：“當云何守是三昧？天中天！”

佛告跋陀怱菩薩：“色不當著，不當有所向生，當行空，是三昧當守。何等爲三昧？當隨是法行。復次，跋陀怱，菩薩自觀身無身，亦無所觀，亦無見，亦無所著，本亦無所盲，亦無聾。如經中法，視住亦無所見，亦無所著，無所著爲守道者；於法中無所疑，不疑者爲見佛，見佛者爲疑斷。諸法無所從來生。何以故？菩薩有法疑想便爲著。何等爲著？有人、有壽命、有德、有陰、有人、有對、有想、有根、有欲，是爲著。何以故？菩薩見諸法無所著，是念亦不見。何等爲不見？譬如愚人學餘道自用，有人謂有身，菩薩不作是見。菩薩何等爲見？譬如怛薩阿竭、阿羅訶、三耶三佛、阿惟越致、辟支佛、阿羅漢所見，不喜不憂；菩薩如是見，亦不喜亦不憂；守是三昧，亦不喜亦不憂。譬如虛空，無色無想，清淨無瑕穢；菩薩見諸法知是，眼無所罣礙見諸法，用是故見諸佛。見諸佛如以明月珠持著瑠璃

上，如日初出時，如月十五日在衆星中央時，如遮迦越王與諸群臣相隨時，如忉利天王釋提桓因在諸天中央時，如梵天王在衆梵天中央最高坐，如炬火在高山頂燒，如醫王持藥行愈人病，如師子出獨步，如衆野鴈飛行虛空中道有導，如冬月高山上積雪四面皆見，如天地大界金剛山却臭穢，如下水持地，如風持水，諸穢濁悉清淨，如虛空等，如須彌山上忉利天爲莊嚴，諸佛如是，佛持戒，佛威神佛功德，無央數國土悉極明；是菩薩見十方佛如是，聞經悉受得。”

佛爾時頌斯偈言：

佛無垢穢離塵勞	功德衆竟無所著
尊大神通妙音聲	法鼓導義喻諸音
覺天中天脫諸慧	種種香華以供養
以無數德奉舍利	旛蓋雜香求三昧
聞法普妙學具足	遠離顛倒喻滅度
終不想著於空法	當志解妙無礙慧
清淨如月日出光	譬如梵天立本宮
常清淨心念世尊	意無所著不想空
譬如冬月高山雪	若如國王人中尊
摩尼清淨超衆寶	觀佛相好當如是
如鴈王飛前有導	虛空清淨無穢亂

紫磨金色佛如是	佛子念此供養尊
去諸幽冥除暗愚	即悉速逮淨三昧
捐捨一切諸想求	無垢穢行得定意
無有塵勞釋垢穢	棄去瞋恚無愚癡
其目清淨自然明	念佛功德無礙慧
思佛世尊清淨戒	心無所著不想求
不見吾我及所有	亦不起在諸色相
捨離生死無衆見	棄捨貢高慧清淨
遠離憍慢不自大	聞寂三昧離邪見
其有比丘佛子孫	信比丘尼清信士
除去貪欲清信女	念精進學得是法

## 無想品第十一

佛告跋陀耶菩薩：“若有菩薩，欲學是三昧疾得者，當先斷色、思想，當棄自貢高；已斷思想，已不自貢高，已却當學是三昧。不當諍。何等爲諍？誹謗於空是故不當共諍。不當誹謗空，却誦是三昧。

佛告跋陀耶：“若有菩薩學誦是三昧者，有十事於其中立。何等爲十？一者，其有他人，若饋遺鉢、震越、衣服者不嫉妬；二者，悉當愛敬人，孝順於長老；三者，當有反復念報恩；四者，

不妄語遠離非法；五者，常行乞食不受請；六者，當精進經行；七者，晝夜不得卧出；八者，常欲布施天上天下，無所惜，終不悔；九者，深入慧中無所著；十者，先當敬事善師視如佛，乃當却誦是三昧。是爲十事，當如法，作是行者便得八事，何等爲八事？一者，於戒清淨至究竟；二者，不與餘道從事，出入智慧中；三者，於智慧中清淨，無所復貪生；四者，眼清淨，不復欲生死；五者，高明無所著；六者，清淨於精進自致得佛；七者，若有人供養者，不用故喜；八者，正在阿耨多羅三藐三菩提不復動。是爲八事。

佛爾時頌偈言：

有點慧者不起想	棄捐貢高及自大
常行忍辱無麤漏	爾乃爲學是三昧
智者心明不諍空	無想寂定是滅度
不誹謗法莫諍佛	如是行者得三昧
明者於是無憍慢	常念佛恩及法師
堅住淨信志不動	爾乃爲學是三昧
心不懷嫉遠杳冥	不起狐疑常有信
當行精進不懈怠	如是行者得三昧
比丘學是常分衛	不行就請及聚會
心無所著不畜積	如是行者得三昧

設使手得斯法教	及持奉行此經卷
已具足意待如佛	然後學誦是三昧
住是至德行誠信	設有學誦三昧者
速疾速得是八法	清淨無垢諸佛教
其清淨戒有究竟	三昧無瑕得等見
以爲空淨於生死	住於是法得具足
智慧清淨無有餘	無穢行者亦不著
博聞深智捨唐捐	得行如是爲黠慧
志精進者無所失	於供養利而不貪
疾得無上成佛道	學如是德爲明智

## 十八不共十種力品第十二

佛言：“得是上八事者，便獲佛十八事。何等爲十八事？一者，用其日得佛，用其日般泥洹，從初得佛日，至般泥洹日佛無難；二者，無短；三者，無忘；四者，無不定時；五者，終無生法想言我所；六者，無有不能忍時；七者，無有不樂時；八者，無有不精進時；九者，無有不念時；十者，無有不三昧時；十一者，無有不知時；十二者，無有不脫見慧時；十三者，過去無央數世事無有能止佛無所罣礙所見慧時；十四者，當來無央數世事無有能止佛無所罣礙所見慧時；十五

者，今現在十方無央數世事無有能止佛無所罣礙所見慧時；十六者，身所行事智慧，是本常與智慧俱；十七者，口所言事智慧，是本常與智慧俱；十八者，心所念事智慧，是本常與智慧俱。是為佛十八事。

佛告跋陀愁：“若有菩薩無所復著，求法悉護學是三昧者，有十法護。何等為十法護？佛十種十力。何等為十種力？一者，有限無限悉知；二者，過去、當來、今現在本末悉知；三者，棄脫定清淨悉知；四者，諸根精進種種各異所念悉知；五者，種種所信悉知；六者，若干種變無央數事悉知；七者，悉曉了悉知；八者，眼所視無所罣礙悉知；九者，本末無極悉知；十者，過去、當來、今現在悉平等無所適著。”

佛告跋陀愁：“若有菩薩，無所從生法悉護，是菩薩得佛十種力。”

佛爾時頌偈言：

十八不共正覺法 世尊之力現有十  
設使奉行是三昧 疾速逮此終不久

## 勸助品第十三

佛告跋陀愆：“是菩薩持有四事，於是三昧中助其歡喜。過去佛時持是三昧助歡喜，學是經者，自致阿耨多羅三耶三菩阿惟三佛，其智悉具足，我助歡喜如是。復次，跋陀愆，當來諸佛，求菩薩道者，於是三昧中，助歡喜，學是三昧者，自致阿耨多羅三耶三菩阿惟三佛，其智悉具足，其皆助歡喜如是。復次，跋陀愆，今現在十方無央數佛，本求菩薩道時，於是三昧中者，助歡喜，學是三昧者，自致得阿耨多羅三耶三菩阿惟三佛，其智悉具足，其皆助歡喜福。令其與十方人民及蜎飛蠕動之類，共得阿耨多羅三耶三菩阿惟三佛，持是三昧助歡喜功德令其疾得是三昧，作阿耨多羅三耶三菩阿惟三佛得不久。”

佛告跋陀愆：“是菩薩功德，於是三昧中，四事助歡喜，我於是中說少所譬喻。譬如人壽百歲墮地行，至百歲無有休息時，其人行使過疾風周帀四方上下。云何，跋陀愆，寧有能計其道里者不？”

跋陀愆言：“無有能計其道里者，天中天！獨佛弟子舍利弗、羅阿惟越致菩薩，乃能計之耳！”

佛告跋陀愆：“我故語諸菩薩：若有善男子、善女人，取是四方上下諸國土，其所行處，滿中珍寶布施與佛，不如聞是三昧。若有菩薩聞是三昧，於是四事中助歡喜，其福出過布施佛者，百倍、千萬倍、億倍！若見不？跋陀愆，是菩薩助歡喜，其福寧多不？用是故當知之，是菩薩助歡喜，其福甚尊大！”

佛爾時頌偈言：

於是經教中	持有四事勸
過去及當來	現在諸世尊
勸助功德行	度脫諸十方
蜎飛之蠕動	悉逮平等覺
譬如此周帀	四方及上下
人生行百歲	盡壽行不息
欲有計道里	其數難度量
獨佛弟子知	不退轉菩薩
滿中珍寶施	不如聞是法
四事之勸助	其福出彼上
跋陀且觀是	四事之歡喜
布施億萬倍	不與勸化等

## 師子意佛品第十四

佛爾時告跋陀惹：“乃去久遠世時，其劫阿僧祇，不可計不可數不可量不可極阿僧祇，乃爾時有佛，名私訶摩提·怛薩阿竭·阿羅訶·三耶三佛。其威神無有與等者，安隱於世間，於經中之尊，天上天下號曰天中天。於是國土空閑之處，是閻浮利國土豐熟，人民熾盛樂。是時，閻浮利內，縱廣十八萬拘利那術踰旬。是時，閻浮利內，凡有六百四十萬國。爾時，閻浮利有大國名跋登加，其國中有六十億人，私訶摩提佛在是國中。有遮迦越王名惟斯芩王，往到私訶摩提佛所，爲佛作禮，却坐一面。時，私訶摩提佛即知其王心所念，便爲說是三昧。其王聞是三昧助歡喜，即時珍寶散佛上，其心即念：‘持是功德，令十方人民皆安隱。’

“時，私訶摩提佛般泥洹後，惟斯芩遮迦越王，其壽終已後，還生王家作太子，名梵摩達。爾時，閻浮利有比丘高明名珍寶，是時爲四部弟子，比丘、比丘尼、優婆塞、優婆夷，說是三昧。梵摩達太子，聞是三昧助歡喜心，踊躍樂喜聞是經，持珍寶直百億，散是比丘上；復持好衣供養

之，以發意求佛道。時，與千人俱，於是比丘所剃頭鬚作沙門，即於是比丘所從索學是三昧。與千比丘共，承事師八千歲不休懈，前後一反，得聞是三昧。

“是比丘輩聞是三昧四事，助歡喜入高明之智；持是助歡喜功德，却後更見六萬八千佛，輒於一一佛所聞是三昧，自守學復教他人學。其人持是助歡喜功德，其後得作佛，名坻羅惟是逮。怛薩阿竭。阿羅訶。三耶三佛。時，是千比丘，從得阿耨多羅三耶三菩阿惟三佛，皆名坻羅首羅鬱沈。怛薩阿竭。阿羅訶。三耶三佛，教不可計人民皆求佛道。”

佛告跋陀愁：“何人聞是三昧不助歡喜者？何人不學者？何人不爲他人說者？何人不守者？”

佛告跋陀愁：“若有菩薩，守是三昧者疾速得佛。跋陀愁，若有菩薩在四十里外，聞有持是三昧者，菩薩聞之便當行求往到其所。但聞如有是三昧常當求之，何況乃得聞學者？若去百里者，若遠四千里，聞有持是三昧者，當行學到其所，但得聞知，何況乃得聞學者？”

佛言：“去人遠者，常當自行求，何況去人

十里、二十里，聞有持是三昧者，不行求學？跋陀憇，若有菩薩，聞是三昧欲行至彼，聞求是三昧者，當承事其師十歲、百歲，悉具足供養瞻視。是菩薩不得自用，當隨其師教，常當念師恩。”

佛言：“我故相爲說之，若菩薩聞有是三昧處去四千里者，欲往到其所，設不得聞是三昧者。”

佛言：“我告若曹，其人用精進行求故，終不復失佛道，會自致作佛。見不？跋陀憇，菩薩聞是三昧念欲求不離，其得利甚尊。”

佛爾時頌偈言：

我念過去有如來	人中尊號私訶末
爾時有王典主人	至於彼佛聞三昧
至意黠慧聽此經	心悅無量奉持法
即以珍寶散其上	供師子意人中尊
心念如是而歎言	我身於此當來世
奉行佛教不敢缺	亦當逮得是三昧
用是福願壽終後	輒復來還生王家
爾時見尊大比丘	號曰珍寶智博達
應時從聞是三昧	踊躍歡喜即受持
供以好物若干億	珍寶妙衣用道故
即與千人除鬚髮	秉志樂求是三昧
同時具足八千歲	常隨比丘不捨離

一反得聞不復二  
執持經卷諷誦說  
用積累是功德故  
其所具足八萬歲  
曾值諸佛六萬億  
聞所說法大歡喜  
蒙此功德生王家  
化無數億諸人民  
諷誦學是法已後  
天上世間誦其稱  
何況受持誦說者  
廣宣分流是三昧  
此三昧經真佛語  
用道法故往聽受  
假使往求不得聞  
無能稱量其德義  
設有欲求是三昧  
教習奉行莫退轉

是三昧者譬如海  
其所生處聞三昧  
當見諸佛大神通  
所見諸佛輒供養  
加復供養六千尊  
然後得見師子佛  
見佛號曰堅精進  
度脫一切生死惱  
便復見佛名堅勇  
聞三昧聲得作佛  
於衆世界無所著  
未曾疑忘於佛道  
設聞遠方有是經  
一心諷誦不忘捨  
其功德福不可量  
何況聞已即受持  
當念往時彼梵達  
比丘得經當如是

## 至誠佛品第十五

佛言：“乃往昔時復有佛，名薩遮那摩。怛薩阿竭。阿羅訶。三耶三佛。時，有比丘名和輪，其佛般涅槃後，是比丘持是三昧。我爾時作國王剎利種，於夢中聞是三昧，覺已便行求持是三昧比丘，即從作沙門，欲得於是比丘所一反聞是三昧。承事師三萬六千歲，魔事數數起不得一反聞。”

佛告比丘、比丘尼、優婆塞、優婆夷：“我故語若曹，若曹當疾取是三昧無得忘失，善承事其師，持是三昧至一劫、若百劫、若千劫莫得懈倦，趣當得是三昧。守善師不離，若飲食、資用、衣服、被、牀卧，千萬珍寶以用上師，供養於師無所愛惜。設無有者，當行乞食給趣，當得是三昧莫厭。”

佛言：“置是所供養者，此不足言耳！常當自割其肌供養於善師，常不愛惜身，何況其餘？當承事善師如奴事大夫。求是三昧者當如是，得是三昧已當堅持，常當念師恩。”

佛言：“是三昧難得值，正使求是三昧至百億劫，但欲得聞其名聲不能得聞，何況得學者，轉復行教人？正使如恒邊沙佛剎，滿其中珍寶持

用布施，其福寧多不？不如書是三昧持經卷者，其福極不可計！”

佛爾時頌偈言：

我自識念徃世時	其數具足六萬歲
常隨法師不捨離	初不得聞是三昧
有佛號曰具至誠	時知比丘名和輪
彼佛世尊泥曰後	比丘常持是三昧
我時爲王君子種	夢中逮聞是三昧
和輪比丘有斯經	王當從受此定意
從夢覺已即徃求	輒見比丘持三昧
即除鬚髮作沙門	學八千歲一時聞
其數具足八萬歲	供養奉事此比丘
時魔因緣數興起	初未曾得一反聞
是故比丘比丘尼	及清信士清信女
持是經法囑汝等	聞是三昧疾受行
常敬習持是法師	具足一劫無得懈
勿難千億用道故	當得聞是法三昧
衣服牀卧若干億	比丘家家行乞食
以用供養於法師	精進如是得三昧
燈火飲食所當得	金銀珍寶供養具
常當自割其肌肉	以用供養況飲食
明者得法疾持行	受學經卷有反復

是三昧者難得值 億那術劫常當求  
所周旋處聞是法 當普宣示諸學者  
假使億千那術劫 求是三昧難得聞  
設令世界如恒沙 滿中珍寶用布施  
若有受是一偈說 敬用功德過於彼

## 佛印品第十六

佛於是語跋陀憇：“若有菩薩聞是三昧，聞者當助歡喜當學。得學者持佛威神使得學，當好書是三昧著素上，當得佛印印，當善供養。何等爲佛印？所識不當行，無所貪，無所求，無所想，無所著，無所願，無所向生，無所適，無所生，無所有，無所取，無所顧，無所往，無所礙，無所有，無所結，所有盡，所欲盡，無所從生，無所滅，無所壞，無所敗。道要道本是印中，阿羅漢、辟支佛不能壞、不能敗<sup>3</sup>、不能缺，愚癡者便疑是印，是印是爲佛印。”

佛言：“今我說是三昧時，千八百億諸天、阿須輪、鬼、神、龍、人民皆得須陀洹道；八百比丘皆得阿羅漢道；五百比丘尼皆得阿羅漢道；萬菩薩皆逮得是三昧，皆逮得無所從生法樂，於

<sup>3</sup> 大正藏：不能敗；永樂北藏及龍藏：所敗；校勘：不能敗

中立；萬<sup>4</sup>二千菩薩不復還。”

佛語舍利弗、羅摩目犍連、比丘阿難、跋陀  
憇菩薩、羅鄰那竭菩薩、憍曰兜菩薩、羅達菩薩、  
須深菩薩、摩訶須薩和菩薩、因坻達菩薩、和輪  
調菩薩，佛言：“我從無央數劫求佛道以來，今  
已得作佛，持是經囑累若曹，學誦持守無得忘失。  
若有跋陀憇菩薩學是三昧者，當具足安諦學，其  
欲聞者當具聞，爲他人說者當具說。

佛說經已。跋陀憇菩薩等，舍利弗、羅摩目  
犍連、比丘阿難等，諸天、阿須輪、龍、神、人  
民，皆大歡喜，前爲佛作禮而去。

般舟三昧經卷下

<sup>4</sup> 大正藏：樂，于中立；萬；永樂北藏及龍藏：樂；于中六萬；校勘：樂，于中立；萬

## ● 結誦儀

### 補闕真言

(三編)

南無喝囉怛那. 哆囉夜耶. 佉囉佉囉. 俱住俱住.  
摩囉摩囉. 虎囉. 吽. 賀賀. 蘇怛那. 吽. 潑抹拏. 娑  
婆訶.

### 補闕圓滿真言

(三編)

唵. 呼嚧呼嚧. 社曳穆契. 莎訶

### 普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉  
嚩吽

南無阿彌陀佛 (合掌三稱)

南無般舟三昧經 (合掌三稱)

## 迴向偈

(一編)

願以此功德 莊嚴佛淨土  
 上報四重恩 下濟三途苦  
 若有見聞者 悉發菩提心  
 盡此一報身 同生極樂國

## 三皈依

(一編)

自皈依佛，當願眾生，體解大道，發無上心；  
 自皈依法，當願眾生，深入經藏，智慧如海；自  
 皈依僧，當願眾生，統理大眾，一切無礙。和南  
 聖眾。



此咒置經書中可滅誤跨之罪

南无护法韦驮尊天菩萨

